



道

藏

17

第一十七册

道藏

李一氓



文物出版社
上海書店
天津古籍出版社

图书在版编目(CIP)数据

道藏/上海书店出版社编. —上海:上海书店出版社,
1988.3(2005.6重印)

ISBN 7-80569-528-8

I. 道... II. 上... III. 道藏—影印本 IV. B951

中国版本图书馆 CIP 数据核字(2000)第 44776 号

道
藏(全三十六册附索引一册)

出
版

世紀出版集團
上海書店出版社

(上海福建中路一九三號)

文物出版社

(北京五四大街十九號)

天津古籍出版社

(天津河西區佟樓三合里)

印
刷

江蘇省金壇市古籍印刷廠

發
行

世紀出版集團發行中心

定
價

柒仟伍佰圓

1988 年 3 月第一版 2005 年 6 月第 6 次印刷
ISBN 7-80569-528-8/Z · 18

目錄

太上玄靈北斗本命延生真經注五卷	一七一
太上玄靈北斗本命延生真經注解三卷	一七一三九
太上玄靈北斗本命延生經注三卷	一七一六五
北斗七元金玄羽章一卷	一七一八七
太上說玄天大聖真武本傳神呪妙經六卷	一七一九〇
太上老君說常清靜經注一卷	一七一四一
太上老君說常清靜經注一卷	一七一四三
清靜經注一卷	一七一六四
太上老君說常清靜經注一卷	一七一六六
太上老君說常清靜經注一卷	一七一七四
太上老君說常清靜經注一卷	一七一八二
太上老君說常清靜妙經纂圖解注一卷	一七一九四
太上老君元道真經注解一卷	一七二〇四
太上太清天童護命妙經注一卷	一七二〇九
老子說五厨經注一卷	一七二一三
太上三元飛星冠禁金書玉籙圖一卷	一七二一五
上清金闕帝君五斗三一圖訣一卷	一七二一八
四氣攝生圖一卷	一七二二四
太上通靈八史聖文真形圖一卷	一七二三四
圖經衍義本草四二卷序例五卷	一七二三八
混元聖紀九卷	一七七七九

太上老君年譜要略一卷
 太上老君金書內序一卷
 太上混元老子史略三卷

一七一八八四
 一七一八八四
 一七一八九〇

北斗經題辭

十一

題辭一章乃梓潼帝君之所作也其文備述北斗之玄玄中天之妙妙也凡諸同志欲誦北斗經先念題辭則知一經之始末也不可忽之

北斗題辭者所以題號北斗之經真玄之要訣法之首也北位也斗者萬象之尊尚也此經北斗之所化也故

太上賦以北斗其厄難則各自有名北斗大聖也居乎中天而統三界也晝夜常輪無有休息運度死生故曰玄矣斗用柄轉為柄所用而乃置星符所令其斗也玄元始炁也或曰北斗即北極北辰之象故北倚於坎動靜而行亘於中也三台之覆能生養護分令成道北斗生有元靈難量其德萬象慈母三清之教任於紫光之妃化生備陰陽之道通五行尤長於延生永壽之始魔道縱橫用邪爭強以侵真妙當此之際孰能為謀以為上法玄玄大範將為廢

老君頌起故飛來於蜀欲度衆生以宣真妙

至道非一北斗本命祈禱災福生養之訣昭著幽微靡所不載時值正月初七日而有地神於是玉局衆扶周天大世得道真聖分班侍焉思濟斯民天師契合太上之心越班而請乎玄靈之事

天尊凭几可其說北斗世莫知司天樞之紀錄治地軸之動靜建歲運扇春風雍熙之和了歲時成三臘之窮冬自立世而無終焉是故垂道言以度後人

太上有云我欲托之斯言不如載之真訣之深切著明也於是斗真並集所與高第弟子天師張道陵之屬補疑釋問遂自撰其本命之言成經一卷包羅天地揆敘萬類仁義道德性命禍福繁然靡所不備帝王公侯遵之則可以致長生契天道卿大夫士奉之則可尊君父保身命志士上智者持之則可以成仙道駕飛雲有緣人之修道二炁之正焉可謂玄而靈之延而生之覆世大聖之太玄者也太上自蜀闡化然後道正經訣各得其所乃分章有訣遂消厄得延生北斗後自垂光

體三清之道而著作焉此真常湛寂而明者也千百歲之遙傳布

太上所言以為靈寶靈寶者萬真之總會六合之綱領也北斗之經則而象之漢天師傳斗於老君老君授以本命妙行尊問大道

元始對以度人漢明帝遇斗於終南斗真將玄靈而自授唐太宗受道於羊角元始曰汝為天子安能何道不行哉旨意合同若此者衆又有道德千言蘊奧妙故說斗經為徑其文不可弘深不與靈篇相似是以北斗本真後世依倣而訛傳者也北斗不得靈者大道閉塞妙法無聞真途迷惑耳耳流來北斗玄靈暗矣其經號為本命故篇籍幸不泯滅聖朝求賢禮士開延道德是以清炁結聚修鍊之士明法注經授訣度人皆有其類故有古漸至士雖掌五刑之科肯與斯經通義特列北斗之明事謂之注文辭理長於引喻意不疎遠而道已獨至其言曰說詩者不以文害辭不以辭害志以意逆志為得之矣斯經殆欲使後人徑知其妙故解其文不但作於

爲已也前賢解者往往拾取而說之其說甚多世聖不同蜀都以來千百餘載傳之者亦已衆多道齡徐卿至真無僞有自來矣侍父素養崇道習儒弱冠之際遺志於經取長收要本有數家飛騰吏詮之內十有餘年心欲功補何勤能焉幸息肩弛擔於吳會之間潛心溫故知新以盡瓊見全其所願遂其所志釋皇明玄庶補萬一余司文昌之星會英聚靈摩所不知歷代傳之於翰墨至今得明於教者惟北斗之訣後學之士釋而辯之者又自詳矣道齡存志北斗闊遠微妙開誦明見更書朝禮之科於是乃述已所開證以經傳綉諸靈符具載本經章別其旨分爲上下凡二十四厄總而言之不出乎本命者以啓後人可以釋疑破惑余亦字字訂其是非後之奉者盡其修養皆得長生不負玄陽徐道齡之用心共樂无上之逍遙不亦可乎

誦北斗經訣

凡誦經或朝禮先歛神叩齒端坐調息閉目靜思泥丸宮中有九宮九星各處一官而坐七人如真形之狀二人輔弼之服記存天上北斗星光燦然如見即以古柱上脲成金橋一道五臟出五色炁五條乘橋而上橫亘斗中即呼四直使者從橋而入斗中通告某事次見擎羊陀羅二使者如五女狀青衣仗劍一人執曼陀羅花一人執楊枝自斗中度橋而下入我身中九宮之內復出一室之中檢校都畢復入斗中良久但見斗中九皇如已形中九人之服乘雲炁自橋而下入泥丸九宮之室與我對坐倏然合爲九人杳冥之際復合爲一人自泥丸宮中乘雲下入黃庭之內訖次端坐持誦

淨口神呪

出納之門 上下有神 吉凶之戶 炁津常存 吾今朝禮 一念存真 會集萬聖 叩之必聞 急急如太上律令勒

淨心神呪

天玄天玄 真一自然 去邪歸正 惟思靜專 一身之主 萬法之先 定而不可測 動而不可言 今表裏靜 引我拜前 急急如太上元降律令

淨身神呪

靈寶祖炁 安慰黃闕 白帝清魂 赤帝定魄 黑帝生炁 青帝養血 黃帝中主 萬神敢越 前有朱雀 後有玄武 左有青龍 右有白虎 侍吾之身 元神鼓舞 各按方位 同朝斗府 急急如太上老君律令

勅水神呪

太一之精 洞玄之靈 能生萬物 能滌羣情 吾今灑蕩 天地澄清 急急如太上律令勒

開天地秘章

洞虛玄元 晃朗無邊 八方正炁 混合自然 靈寶司命 普化九天 豁落答那 洞罡神仙 斬絕惡鬼 掃蕩妖煙 中山玄呪 元始靈篇 吾誦神集 天地回旋 三元五嶽 八海朝元 魔王束首 真聖衛軒 凶穢消散 道德成全

急急如太上老君律令勅

北極靈章

北極璇璣 中天魁罡 絡緯天地 運轉陰陽
德出萬聖 位列九皇 掃除惡穢 普降吉祥
喉舌之使 陀羅擎羊 雷門十二 開指生光

生物覆世 振作紀綱 吾總樞柄 永鎮坎方
龜蛇合體 龍虎成行 神劍一下 斬絕魔王
急急如北極玄天玉虛上相仁威上帝律令

安神寶章

杳杳冥冥 混合無形 玄元始炁 天地人靈
道非常道 名無定名 空洞凝結 真妙化生
既分五正 始屬七星 今蕩滌 內外澄清
功德圓滿 魂魄自寧 急急如天皇大聖老
君律令勅

北斗玄玄妙品靈章

北斗七真 朝共二尊 隨時運建 應炁常存
天皇大帝 紫微玄辰 光明燭世 大若車輪
閉人死戶 開人生門 二炁之化 五行之君
上朝元始 下覆崑崙 自子至午 十二元辰
請必免罪 誦可蒙恩 天罡掌握 輔弼絲綸

三官聽命 五帝衛真 庚申甲子 本命生辰
隨力章醮 福自臻身 三千大將 二萬靈神
作惡滅算 造善益津 能清七鬼 能制三冤
朗誦玄呪 掃蕩妖氛 急急如紫微大帝律
令

北極尊帝靈章

北斗九君 乃天地根 扶危解難 有方便門
十二時屬 三元炁存 斡旋造化 成就天人
罡神指處 鬼宿停輪 咩鉢苛叱 光徧乾坤
漸樂和叱 掃除妖氛 今夕凝結 拘魄束魂
內外清淨 表裏更新 三尸安位 九靈守真
以合大聖 混沌自分 凡有祈請 一一遂聞
急急如太上元老天主律令勅

開經無上妙品靈章

稽首太上尊 歸命禮北斗 仰啓二尊帝
朝現七元君 經始蜀都出 道爲天人根
消災解危厄 保命守玄真 南陵三千使
北斗七千神 俱來衛法座 同入清淨門
今志心誦 道炁自然存

太上玄靈北斗本命延生真經註卷之一

玄陽子徐道齡集註

乾陽子徐道玄校正

太上者極大爲太最高爲上乃太極无上
也惟三清人君之父得以稱之玄靈者乃
天地之玄炁七政之精靈北斗之慧光世
人之性命也人稟清靈之炁結成此身遂
生魂魄血氣也北斗者天地之大德大化
真炁正道結爲玄象運乎中天建四時均
五行生殺萬物統治天地察錄善惡無一
物不係其所管也本命者天一生水蓋自
北斗生也斗在北旺於水司生司殺養物
濟人之都會也人稟天地之炁爲男爲女
可壽可夭皆出乎北斗之政令也人能認
本命神不越修奉念本命號使不虛過則
得尼解災消而獲福無量矣延生者乃北
斗期世人脩身向道使保天年人能禮斗
朝真即得延生之道也故天不動則不能
長覆斗不動而豈能常輪人不延焉得長
生也真者即真妙之義不可測之玄玄也

經者經也若經久傳訛似有縱緯而經緯不堪紋理參錯則成瑕疵也又經者徑也徑不通直如入道修真之人迷其要路也又經者絡也若人經絡失度則生疾也經若不明則不得真玄也

爾時太上老君

爾時者謂當太上說經之時也老君乃天地之本始造化之祖宗也歷代應現未有誕生之迹將欲和光同塵而立世教乃先命玄妙玉女即元上元君為天水尹氏之女名益壽適仙人李靈飛靈飛本皐陶之後感其父李慶賓白日飛昇之事精修大道亦百餘歲當老君未誕而昇天殷朝十八世王陽甲踐祚之十七年庚申歲寄胎在孕鍊真八十一年至二十二王武丁之九年庚辰歲二月十五日卯時降生于亳今太清宮舊宅存焉周武王時為柱下史昭王癸丑年過函谷關授尹喜真人道德五千言計二百七十四年至甲寅四月二十八日老君白日昇天期尹喜真人千日

外會於蜀青羊肆中至丁巳年之蜀拜遇老君乃從仙駕周遊九天隨方設教孔聖師之至報王時計九百九十六年已魏明帝贊曰為周柱史經九百年唐太學博士吳揚昊贊云老君變通靈應難測既生商日又仕周時計其始終乃歷千載後降成都授此經訣乃漢桓帝永壽元年乙未正月初七日又自唐太宗時以仁愛之道說經於羊角山宋政和年間降于茅山王晨觀授梁光祿加句天童護命經之後至今靈驗之事不可枚舉○老君生時九龍吐水化為九井灌洗身形生而鬚髮皓白有七十二相八十一好行步蓮華乃至九左手指天右手指地曰天上天下唯我獨尊我當闡揚无上道法普及一切衆生時有自然天衣掛體九日之中身長九尺感天神贊十號之名號曰太上老圓神智天上尊帝王師大丈夫大仙尊天人父无為上人大慈仁者元始天尊今者略述太上紀號同志皈依各獲福報也

以永壽元年正月七日

太上哀憫衆生屢降成都授與天師靜應真君延生經訣五斗符相靈文五斗真君名字永壽元年正月七日授此北斗玄靈本命真經十五日授南斗六司延壽度人妙經及靈寶妙道五斗真經至永壽二年正月初七日說東斗長生護命真經十五日復說西斗大計護身經又以天師真人其能修謹奉行老君復現全身於清虛中昇玉局座宣說中斗保命延生玄真妙經先北而後南次東而復西者蓋北斗位處坎宮宰御水源水屬於北以北為天天一生水故先授此經南斗位處離宮宰御火帝火屬於南以南為地地二生火故南斗真經次二授之其東斗西斗中斗五斗經文皆依造化次序言之故有其時也在太清境上太極宮中經云无上大羅之天三清之境也玉清聖境十二聖天元始天尊所治玉清之下上清真境十二真天玉宸道君所治上清之

下太清仙境十二仙天太上老君所治若
在人身則上丹田泥丸府上應玉清宮中
丹田絳宮府上應上清宮下丹田交會府
上應太極宮太清境上正老君所治之宮
名曰三皇洞神太清太極宮也

觀見衆生億劫漂沈周迴生死

太上應化徧滿天下分身之處皆是太清
太極宮也太上常以慈憫之心觀察衆生
衆生猶中也天居上地居下人居其中乃
中方中土之生人也又作去聲者多也字
義兩說也數至十萬爲一億劫者結也亦
云時也人之一生必備三千六百劫塵勞
乃命分配定之結數也爲世人肆行不道
恣縱姪殺天喪其身不能全其本年未能
輪迴生死前結未盡又有一生塵結積結
億萬不能解釋正所謂行善事結良緣行
惡事結惡道若結惡多了則漂流苦海之
中沈溺生死之內無有休息永爲下鬼矣
人能一日行一善事著一善功活一物命
是解了三塵結即歷過三劫也若人日行

一善則一年解了三百六十結又能在世
活人生命濟人利物精修大道悟性歸真
則百千萬億結塵勞一時盡滅謂如百年
暗室若慧燈一照滿室光明梵語劫波此
云時也不論時之長短延促多時少時通

而言之謂劫也又謂霎時也如玉樞經云
往昔劫中也天尊何嘗入劫耶即是往昔
此時與此濟人之念也又劫者歇也誓也
如龜龍蟲蛇之屬伺雷收聲則隱歇其形
雷鳴則出其形乃爲一劫之名其牛馬羊
犬雞豚禽畜之類亦各有劫但受諸苦而
已故聖人立教於身三業中戒殺爲上孟
子云見其生不忍見其死聞其聲不忍食
其肉是也三界之中亦皆有劫陽炁結爲
天爲男陰炁結爲地爲女善人取惡妻聖
賢生不肖乃煩惱結也善人遭賊吉人逢
害乃生死結也入道之士若以道齡之言
爲心念念以善功方便解之則無此結也
佛經有云解百生冤結若不解之世世相
遇可不勉諸

或居人道生在中華或生夷狄之中或在蠻
戎之內或富或貴或賤或貧

中華者即中國也東南曰揚州正南曰荆
州河南曰豫州正東曰青州河東曰兗州
正西曰雍州東北曰幽州河內曰冀州正
北曰并州此爲貢別中國之九州也九州
之外東曰夷西曰戎南曰蠻北曰狄經云
人有五常十善之心孝弟忠良之行報生
人道在中華之國富貴者因布施三寶惠
貧拔苦拯難救危中來貧賤者因慳貪不
捨取非義財物中來邊夷下賤者從殺生
邪淫不信因緣中來此太上天眼觀見衆
生所作罪福隨業而受報也
暫假因緣墮於地獄

人生在世稟於富貴貧賤之中蓋處之不
以其道富者不義不仁不慈不施貴者不
公不法不忠不勇貧者不安分賤者不伏
下所以萬事萬理顛覆錯亂遂至苗害生
禍患作墮於煩惱也釋藏偈云福德力故
今多順今多順分放逸生放逸終無持戒

心以是因緣入地獄正謂此也

為無定故

夫定者乃入道之要路延生之捷徑也定者正也身若不正豈能入道心若不正豈能延生延字之義亦從正從之又定者靜也向也止也決也水定則不流地定則不陷心定則萬慮息身定則萬事止性定則炁靈神定則炁清而定非靜不能成也蓋世人無靜向止決之力量則行義不能達其道修真不能造其真是以心心不定業

業相隨又豈能延生而明玄靈之本命耶。玉樞經云能知止則泰定安大學云知止而後有定此知止是知有這箇道理須是得其知止方是如知為人子必孝知為臣必忠能得是身親為忠孝之道見得此事合當如此則志有定向心有止決乃是大力量之人如孟子云富貴不能淫貧賤不能移威武不能屈是也若心不定至於事親之際為私欲所汨不能盡其孝事君之際為利祿所汨不能盡其忠也今人有親

不孝居官者不法處富貴者沽名有子者更娶是不知止不安分不守靜不予決乃心無定故舊必及其身矣人能知止安分守靜決定則不求生而自得延生未入道已達其道矣何舊患之及焉上智之士若下靜定工夫心無簣止久久成功小則延壽算入仙真大則朝玉帝禮三清也。罪業牽纏魂繫陰司受苦滿足人道將違生居畜獸之中或生禽蟲之屬轉乖人道難復人身

道釋二教戒十惡業殺盜邪淫貪嗔惡癡妄言綺語惡口兩舌皆訓人為善也此十惡業即姦盜詐偽在於法律禁斷非輕人有一犯枷禁牢獄手足桎械拷箠斷警跡錄徒是與禽獸何異哉此章言人先世作業惡籍滿盈斗府三官檢覈文移獄繫神魂拷掠報對苦楚受足今得再生又作諸惡乃將違人道也後世即生畜獸之中禽蟲之屬是轉乖人道難復人身也如此沉淪不自知覺為先世迷真之故受此

輪迴

知覺者曉悟也真者正也直也化也聖也靈通而妙明也天無真萬物不春地無真草木不根人無真不能御神成真者遇水不溺遇火不焚出三界化十方役萬神合一炁非真焉能得耶非真何能成耶所以此斗稱真君玄帝稱真武諸得道者皆稱真人吾夫子明德之論非真如何得知止定靜也真之一字豈易言哉太上哀憫世人生於中夏蠻夷富貴貧賤乃受天命於斯止向假此因緣為心無定故罪惡相聯將違人道此章欲令眾生省悟修真也不知知覺者因迷真道不入仙宗故不知所命之命夫命者定命也如天賦與富貴貧賤處之以道即如天命而然者樂天者也少有所賦非其命者即是迷真違命也既違命迷真則沈淪而不自知覺也凡奉真持訣之士能於知覺上尋出無可知覺方是得延生之訣也太上演教經旨幽微一句一字皆是訣法下學之士豈易窺測者

哉若以文字近俗而鄙之徒憎謗訕罪根難滅也謂如不自知覺當太上授經之時緣何不言自不知覺其自不二字與不自二字大有懸絕亦與前後經旨不相干也蓋不字在上者乃不自去理會本來所命貴賤壽夭之因緣也不字在下自不知覺者却是不知所覺也不自知覺乃知其所覺之覺而不自悟也明矣誦經同志之士當味其經旨熟究深思庶不負太上垂教立言之聖意也

乃以哀憫之心分身教化化身下降

太上至神至聖大智大慈雖高居三境之中宴處九重之內而哀憫衆生之心無時少息也太上化身降於蜀都授此經訣饒益衆生度脫輪迴之苦也

至於蜀都

蜀都者即今之成都府也漢明帝問僧摩騰曰法王在世何故化不及此對曰迦毗羅衛國乃三千大千世界之中心三界諸佛皆於彼土凡有願行者悉生于彼受佛

正化咸得悟道餘衆生無緣感佛佛不往也佛雖不往光明及處或五百年或一千年或千年外皆有聖人傳佛聲教而教化之何故太上降於蜀都餘方不往蜀乃坤維福地天師正一真君彼時於鶴鳴山修鍊九鼎丹成又能宣揚教化故降于彼以授經訣也

地神湧出扶一玉局而作高座

玉者天地日月之精華陰陽水火之結秀也潤而溫寶而貴萬載之不可朽滅也局

乃曲脚之玉寶座也如普化天尊所座七寶層臺即珍寶嚴飾七級龍鳳之座也太

上哀憫衆生降世說經三界萬靈孰不奉迎宜乎地神扶擁玉局以待衛也說經已竟玉局復沉地中今玉局化洞乃成都之遺跡也

遺跡也

於是老君昇玉局座授與天師真人北斗本命經訣廣宣要法普濟衆生

漢傳天師諱道陵字漢輔沛豐邑人留侯子房八世嫡孫名大順之長子也子房陰

功隱行流芳後葉天師母初夢天神自北斗魁星中降至地長文繡衣以衛徽香授之既覺衣服居室皆有異香經月不散感而有孕於光武建武十年甲午正月望日生于吳地天目山時黃雲覆空紫炁

盈庭空中光明如日經月復聞昔日之香淡日方散年及冠身長九尺二寸眉廣額綠睛朱頂隆鼻方頭目有三角伏犀貫腦玉枕峯起手垂過膝美鬚髯龍蹠虎步望之儼然雖親友見之肅如也七歲讀道

德二篇十許篇而達其旨於天文地理河洛圖律之書皆極其妙通習墳典廣覽無遺從學者千餘人天目山南三十里西北八十里皆有講誦之堂臨安神仙觀餘杭通仙觀即其地也後起賢良方正直言極諫科中之身雖仕而志鍊形輕舉久之退隱北邙山三年有白虎嚙符置座傍朝廷就徵爲博士稱疾不起和帝即位以三品印綬駟馬車等徵爲太傅後封冀縣侯三詔不就時永元四年壬辰歲也遂自河洛

歷江淮名山徧禮洞府所流入蜀及諸洞室遇神人告教獲丹書秘訣遂於鶴鳴山修鍊九鼎丹成未敢服謂弟子王長曰沖天之士當功及生靈佐國安家興利除害然後輕舉臣事三境則無愧焉苟利一身功不及民非大道弘濟之旨也至順帝時漢安元年壬午歲正月十五日午時感金闕後聖玄元道君即老君下降以正一盟威法籙三五斬邪之劔都功版券職籙以授之遂服丹戰鬼置立治庭而後太上復以三洞衆經九百三十卷符籙丹竈秘訣七十二卷并冠服等以賜之至桓帝永壽元年屢授此經并五方五斗真經至永壽二年夫人雍氏同時白日昇天位爲太玄都正一真人三天扶教輔元大法天師也太上所授經訣即法也經中字字皆是要法奉道之士悟得一字一句一法一訣得離迷途直趨道岸道陵二字乃天師之名誦經至此雖臨文不諱然起敬之誠當以真人二字代誦之

是時老君告天師曰人身難得中土難生假使得生正法難遇

按四十二章經佛言人離惡道得爲人難既得爲人生中國難既處中國遇道者難又云世間得人身者如指爪上土失人身者如大地之上太清境黃庭經云人以精爲母以氣爲主五臟各有精精中生氣五臟各有氣氣中生神神能生壽長生保命鍊精爲丹養氣爲神真仙上聖修真養氣自然而然內真外應有作必成自凡入聖男子之生先生右腎以外精而內血陰爲裏也女子之生先生左腎以外血而內精陽爲裏也腎生脾脾生肝肝生肺肺生心心生小腸小腸生大腸大腸生膽膽生腎腎生膀胱膀胱生三元三元生三焦三焦生八脉八脉生十二經十二經生十五絡十五絡生一百八十纏絡一百八十纏絡生一百八十纏絡一百八十纏絡生三萬六千絲絡三萬六千絲絡生三百六十五骨三百六十五骨生八萬四千毛竅三百

日胎完氣足靈光入體與母生離而爲人也人身難得信有之矣聖人應運二萬年爲一劫二千年爲一小劫降世賢人五百年然後一閻世老君大聖人應運衆生得遇演說正經實難可得見矣得遇之人不生信向痛可惜哉夫天地之間人爲貴人最靈上界爲聖爲真亦人能也下界爲鬼爲畜亦人化也蓋善善登上界惡惡降下世所以陰陽二炁得天之命令方得爲男爲女有若針芥之難投聖凡之難遇也哉道齡受先師之秘旨太上曾以三十二字真玄之竅訓度祖天師張真君云人身難得真妙難逢忽然輪迴去無所從學道之士誠以守中自然湛寂與天地同此乃祖師得道之徑路也今道齡不敢固蔽併註此章願與同志共爲進道之萬一云耳多迷真道多入邪宗多種罪根多肆巧詐多恣姪殺多好羣情多縱貪嗔多沈地獄多失人身夫人若失真道即入邪宗也罪根者指下

文十惡業也巧詐者乃口業也姪殺者身業也情愛貪嗔者乃心業也罪根既植諸惡熾然而生墮於地獄失却人身也此章言多字之意者乃訓下愚非為上智之士言之也

如此等緣衆生不悟不知正道迷惑者多

已上諸多業報因緣乃太上明開大道彰施法網以示衆生不可觸入犯之以墮地獄失却人身而人自不省悟衣冠足以備禮禦寒蔬食堪可充飢養素道德以富潤其身詩書以增廣其志祿仕可展其學藝業可贍其身而却不守其分不知其止不收放心不求真道恣情縱慾迷惑妄想膠擾擾念念馳驟步步投於惡業網中是誰之過歟

我今哀見此等衆生故垂法教為說良緣今使知道知身性命皆憑道生了悟此因長生人道種子不絕世世為人不生無道之鄉不斷人之根本

道由路也乃日用之間人倫事物所當行

之理衆人之所共由者以教門言之道在太極之先超乎天地形器之外是未有天地萬物之初已有此道剖判之後在天為日月星斗風雨雷霆在人為仁義道德在地為草木山河在序為春夏秋冬在時為冷暖晦晴在教則存誠鍊性在法為功實罪刑故太上曰大道无形生育天地大道无情運行日月大道无名長養萬物吾不知其名強名曰道佛氏亦以未有天地之先為吾真體先儒推原來歷謂由太虛有天之名由炁化有道之名天之所賦曰命令即令也人之所受曰性性即理也天無言如何命令只是大化流行炁到這物便生這物如分付命令一般性是仁義禮智性之與命未嘗偏塞但人禀受却有清濁長短昏明厚薄之不齊故有富貴貧賤壽夭賢愚也若人禀氣至清至粹則為聰明神聖人也若清粹而高明則為富貴壽考之聖人也若高厚悠長則為聰明智慧忠正賢良節義之士也若禀氣薄惡而短者則

為悖逆兇暴邪佞詭譎狠毒愚癡貧賤之人也此善惡雖因人之所禀亦由炁之所生也太上憫念世人故傳經訣以垂正教喻世法以說良緣善巧方便調攝衆生使其知道知身悟性悟命自獲真種既獲真種則長生人道世生生若不棄背則不斷人之根本也此經太上豈特專為汲引下士之設若上智之士於此肯為究竟念念在斗息息存真則列仙有日矣

更能心修正道漸入仙宗永離輪迴超昇成道

太上大慈大悲至仁至聖教化羣生諄切至再始憐衆生禀受天命因無定故乖違人道不覺沈淪遂宣要法言人迷真道而不悟種罪根而不知故令知道知身悟性悟命皆憑道生不斷真種此章又慮世人不能出三界也謂道既能知更當修習時時不捨拳拳照膺漸入初乘積習既久守而不失用功用力至於徹悟休歇之場入仙宗離輪迴成正道也

我故示汝妙法令度天民歸真知命可以本命之日修齋設醮

示汝者謂天師也妙法者即指下文於本命修齋設醮也天民者謂世人乃天所生之人民命天師廣垂濟度也如伊尹曰予天民之先覺者也予將以此道覺此民是也雖然令其歸真知命却無下手之處於此可見矣太上慈悲方便開發衆生以六十日內令認取本命之一日清心齋戒制魄拘魂隨力醮獻投詞拜表禮號誦經俾初真之士不煩不簡不厭不踈易於入道使其漸漸修習行之既久於日日時時皆是本命如此勤求不怠珍重護持其功德力不可稱量也修齋設醮者道以齋爲先經云雖有惡人齋戒沐浴則可以事上帝學道之士雖修齋而不持身口意業之十戒是空守節食於事無益反招愆也設醮者召也即召三界真靈也又曰詔欲人人啓寸心之誠拱伺帝之詔也又曰照乃然燈照人我之性也此乃醮之意也齋法有

三一者設供齋修齋是也可以積德延年二者節食齋又名祭祀齋謂不飲酒不如葷葷可以和精神保壽中士所行也三者心齋謂疏濯其心除嗜慾也澡雪精神去穢累也剖擊其志絕思慮也夫無思無慮則專道無嗜無慾則樂道無穢無累則合道也心齋爲上節食次之設供齋爲下北斗七戒序云太上曰人身難得中土難生假使得生正法難遇三者既備幸莫大焉且夫天無私親常與善人苟能遠惡以從善捨妄以歸真者道豈遠乎哉然而道雖無方學則有序修真之要齋戒爲先戒有七條第一戒者不得捨諸正念妄起非想因以成趣與道相違常常存神炁海入彼妙門第二戒者不得顯露馳騁洩慢靈文常宜慎密晝夜護持七年有功許傳後學第三戒者不得臨弔喪孝履諸厭穢致引外觸干犯正真常須澡潔內外清虛第四戒者不得食諸臭敗三厭五辛招集尸穢濁亂三官常咽津液蕩滌靈源第五戒者不得

面北便溺裸露三光冒觸神明致招殃咎雖居幽室亦當迴避第六戒者不得酒食醉飽作樂無厭昏亂神炁閉塞靈關常須節約以適其宜第七戒者不得交游非類妄習異端執心不一自無指歸常依正教不生疑惑以上七真之戒正是北斗經中之事實爲玄功之初基登真之要路各當遵奉毋替初心倘如戒言則七戒仙官無不擁護留恩降福矣

啓祝北斗

北斗居天之中爲天之樞紐幹運四時凡天地日月五星列曜六甲二十八宿諸仙衆真上自天子下及黎庶壽祿貧富生死禍福幽冥之事無不屬於北斗之總統也人若誠心啓祝叩之必應

三官五帝九府四司

按玉樞經云天官解天厄地官解地厄水官解水厄五帝解五方厄東方青帝主木管肝護魂西方白帝主金管肺侍魄南方赤帝主火管心理氣北方黑帝主水通血

中央黃帝主土脾主中宮主領五臟人配五行受形三官五帝無所不關也九府者上元三宮九府中元三宮九府下元三宮九府合二十七府上元三十六曹中元下元各四十二曹計一百二十曹總領天上

天下人物靈仙鬼神羣類萬物悉皆關會斗宮以通內外之職四司者天曹四司則司命司錄司非司危地府四司則司命司錄司功司殺與三官五帝九府同檢察人間之罪福也太上垂教度脫此有相之外緣使人知懼改惡向善也若人以無爲而內照之則諸神司皆備於我之身矣人形與天地相應頭圓居上象天足方居下象地北極爲天之中央却在北故人之百會穴在頂心却向後日月往來只在天之南人之兩眼皆在南也北斗運轉四時旋行衆曜人心具衆理應萬事握化萬二千精元神十二百形影神流轉血氣通運百關衆神共護於心也三官者三魂也又即人身之三元天地水三穴也五帝五臟也九

府者九竅也四司者四肢也人能降制九竅攝養三魂調順五臟保運四肢不著邪境自戒俗情斷絕人我屏去是非漸入真道豈不快哉

薦福消災奏章懇願

世人於本命之日祈恩請福延壽消災懇禱之情具於詞章奏狀啓祝於北斗并諸司聖真者乃太上布法橋於迷津援衆生於大道人能知悟此身得遇良緣到於彼岸如犯罪人久禁囹圄之中幸遇曠蕩之恩當省躬責己改過知非洗濯其心以去惡沐浴其身勿滌宿污則因其已新者而日日新之又日日新之無有間斷則可爲善人矣若恃有再生之路可延之門舊惡不悛新惡復造是知法令以故違憲條棄性命而就死地淪沒迷途墮沉惡趣失却人身悔之晚矣

虔誠獻禮種種香花時新五果隨世威儀清淨壇宇法天像地或於觀宇或在家庭隨力建功請行法事功德深重不可具陳念此

大聖北斗七元真君名號當得罪業消除災衰洗滌福壽資命善果臻身凡有急難可以焚香誦經尅期安泰

虔誠獻禮者即祭神之義也君子之祭七日戒三日齋必見其祭者誠之至也有其誠則有其神無其誠則無其神可不虔懇也哉威儀者內起恭敬悚懼誠恐之心外見仰瞻稽顙俯伏跪拜之節皆得其儀也臨蒞其民尚容止可觀進退可度況朝真禮聖而無威儀是不敬也隨力建功者乃高下陳設而不拘也上至王公大人尊宿長者德行偉人建齋設醮下及中庸貧病甘節苦行之士蠻夷賤隸之屬獻花酌水各盡己力陳以薦誠惟務精潔却不可居奢用儉處富用貧慳悋輕率穢觸嗔怒殃禍立至矣念此七元真君名號或禮本命真君須是滌除萬慮清淨身心塵念不萌然後誦之口念不如心念忽尔一見本心方是不負太上老君垂教之意當得尅期安泰而善果臻身也

太上玄靈北斗本命延生真經註卷之一

太上玄靈北斗本命延生真經註卷之二

玄陽子徐道齡集註
乾陽子徐道玄校正

於是說大聖北斗解厄應驗曰

大聖北斗七元君能解三災厄

三災者乃星名也按玉樞經云世人欲免三災九橫之厄即於靜夜稽首北辰又按告斗之法亦有置三災星於斗口之前供養者良由此星操惡於諸惡之首也人命遇之能依法醮禳無不獲應矣又三災者

雷噴為天災火焚為地災覆溺為水災此初學之士不得真道在於桔園之中厄運交會未免有此災厄今者幸遇禳解此二十四厄靈符若能持誦斗經禮拜斗懺認本命星君焚化靈符則可免也上智之士更能修鍊成真出乎天命氣數之外豈有此災并諸厄難也

大聖北斗七元君能解四殺厄

殺者即殺伐也蓋正人稟正炁惡人會惡殺也又四殺者四時不正之炁也春感之

為溫夏感之為瘡秋感之為痢冬感之為嗽故曰四殺陰陽中之四殺者丑未辰戌居不正之方也又四殺與三殺七殺皆土家之惡神殺也若人犯之撓害非輕若能依法祈禱解禳則百無禁忌也

大聖北斗七元君能解五行厄

五行者即五臟也一經受病則一身不安也玉樞經云五行奇寒九曜欽欽誦玉經天尊命本人家司命六神上請北斗解一切厄若有此災依法保之禳之

大聖北斗七元君能解六害厄

六害者即身之六賊謂眼耳鼻舌身意也若不禁制則有害也玉樞經云三刑六害隔角交加若能預防朝具禮斗則可以解禳也

大聖北斗七元君能解七傷厄

七傷者人之七情謂喜怒哀樂憂恐也一有過度則傷身也又名七殺也解之慎之則無傷害也

大聖北斗七元君能解八難厄

難者難也即世人之身難逃之惡疾也謂癰瘰癧癰風癆瘵癰此八者若非先曾延奉斗真今不能全備其體離其難也又八難者乃八景之異名也經云昊天論三界真仙聖衆曰汝當戒八漏方可脫八難若能脫八難方可入三清八漏者目淚肝之漏不息壽不齡鼻涕肺之漏損則病必成口唾脾之漏去多勞本形外汗心之漏不收死不停睡涎腦之漏不閉神不靈小腸漏於腎不泌絕不夜夜夢鬼與交神漏太分明姪慾不度節身漏無可憑如是八般漏乃爲八難行若人奉斗七情不妄驚情既不爲害八難厄亦輕上智之士依而行之則能超脫也其有世人覺疾之作急當絕慾減膳志誠齋戒告斗誦經佩服靈符則可消攘也

大聖北斗七元君能解九星厄

九竅不制則起姪慾縱貪嗔之心也又即九曜躔是也若能精修寶鍊奉斗朝真則何災不滅也

大聖北斗七元君能解夫妻厄

經曰父母生之續莫大焉男女居室人之大倫也世人夫婦失於婚合有犯神殺致生災厄北斗乃玉樞所司凡有此厄難至誠齋戒誦經禮懺告斗焚符以消攘之則夫婦和睦子孫昌泰也今人有妻有子或起姪決之心或覲隨食之產三妻五妾別籍異居爭財妬色盡媚魔詛俾以夫婦參商父子狼虎至於遭刑蕩產殞命喪身者有之此自作孽也欲禱之於神而神豈受不臣之請也

大聖北斗七元君能解男女厄

子災嗣絕所致多端但以幼吾之幼以及人之幼更能立功種德則斗真不待禱而令解其災不同求而默賜其子納寵倖妾非徒無益而又害之

大聖北斗七元君能解產生厄

婦人不擅專房之寵不懷妬忌之心即無產生之厄子孫亦衆多也若能改過首謝斗宮朝禮寶懺佩帶符篆持念所屬本命

真君名號能解厄難也

大聖北斗七元君能解復連厄

按玉格云諸一切人雖有智能事多齟齬或成或敗徒有虛名疾病不瘳婚姻失時亦無嗣續或生男女不能長養而卒萬事不能從心者謂犯復連也皆是先亡不得超脫久久無人濟拔雖百千年終不能受生宜解之鍊度生界見在生人自然榮達作事遂意道誨訓玉樞經勞瘁乃尸疰之所致也尸疰變狀不一有傳尸殭屍肺痿骨蒸復連五種皆由虛損得之病源從腎起傳之於心則驚悸少氣夢見先亡故本經云先亡復連是也或問先亡不得超脫復連六親人何能知曰若犯此厄則感此病也既罹此厄急宜寡慾清心餌藥吞符祈告斗真超度祖玄俾亡者獲生善境存者厄解災消也

大聖北斗七元君能解疫癘厄

按消災經云若太白火星入於南斗則於國於家及分野處作諸障難者念此陀羅